

Tri asini e un sceccu

Tri asini parlavanu di lu munnu. Unu diciva: “Pirchi è tunnu?”, L’atru diciva: “Pirchi è chinu di marvaggi?”, L’atru ancora diciva: “Pirchi c’è ancora la guerra?”. Tutti tri, caminannu pi la via, ognunu diciva la sò. Pirchi l’aricchi sentinu e l’occhi vidinu e la gamma è cchiù longa di lu vrazzu?. Pirchi lu latru arrubba e lu bravu fa l’elemosina? E pirchi lu mari è chinu d’acqua e ‘nterra nun ci su li pisci?. Pirchi quannu è iornu c’è lustru e quannu e notti c’è scuru? E pirchi lu celu nun si tocca cu li manu.

Caminannu-caminannu, si truvàru davanti un muru, nun putennu iri avanti, riturnaru ‘nnarrè, cuminciannu a diri: “Pirchi lu sceccu nun parla?”.

Pirchi chistu e pirchi chiddu, finu a quannu si truvàru arrè davanti a natru muru.

Nun putennu iri avanti si nnè vutaru arrè.

Pi tutta la vita ‘sti tri poviri asini e lu sceccu, ficiru iri e vèniri, iri e vèniri, aspittannu ca quarcunu ci avissi dittu pirchi c’era ‘stu muru. Finu a d’ora nun hannu avutu risposta.

Tu, sceccu can un si atru, è ura ca parli puru tu, nun ha dittu ‘nè un pirchi e nnè un pi comu, natri aspittamu a tia, àrmati di curaggiu e allavanca ‘stu muru.

Accussì sulu putemu caminari finu a quannu vulemu natri e sapiri tutti ‘sti pirchi.

Ormai semu stanchi, nun putemu cchiù campari, è junta l’ura ca vulemu essiri liberi di sapiri e di parlari, a mà essiri tutti uguali, o tutti asini o tutti scecchi. Lu munnu ha statu e sarà sempri accussì, lu sceccu, comu sempri, calà la testa e dissi di “SI”.

2010 Giuseppe Cardella